

# U Primu di Settembre

U sole d'estatina ùn si ne vole andà  
È tuttu lu cunturnu ellu face cantà  
Si sente filetta, menta è finochju  
Sopra la piaghja, splendida, corre l'ochju  
Radica è ceppu ! Amici è parenti  
Sò à cannella strinta è stringhjenu li denti  
È si cerca à capì ciò ch'ùn hè da capì  
Pocu vale à pensà, forse menu ancu à dì.

È u vechju dicia : tuccava à mè  
Quessa ùn hè micca ghjusta è ùn si sà perchè  
Ùn ci hè più nè tempi nè ore  
Di a nepita esce forte l'odore  
Bonu, callu, prufondu è paisanu  
Chì copre u paese è tuttu lu suttanu  
È si cerca à capì ciò ch'ùn hè da capì  
Ma ùn vale à pensà, forse menu ancu à dì.

Cum'ella hè accaduta ognunu vole sapè  
Si volta è si gira ma ùn basta à vulè  
E petre di li muri ci guardanu passà  
Sò testimoni muti à fin'di ramentà  
Nantu à lu scalone, di una casa chjosa  
Un gattu russicciu misteriosu posa  
È si cerca à capì ciò ch'ùn hè da capì  
Pocu vale à pensà, forse menu ancu à dì.

Turnata nant'à locu a ghjente si ne stà  
Ognunu s'avvicina ma ùn sà più parlà  
Quant'è u mai più hè grande dolore  
Ma per dà capu ci hè lu nostru amore  
U sempre di lu core ne face d'argumentu  
U viotu ùn pò nunda contr'à u sentimentu  
È si cerca à capì ciò ch'ùn hè da capì  
Pocu vale à pensà, forse menu ancu à dì

Ciò ch'ùn hè da capì ùn ci vole à circà  
Ma pocu vale à dì, forse mancu à pensà.